

Fel y'i haddaswyd gan Ddeddf Cwmnïau 2006

Archwilwyr Ariannol

GBA4 CYM

Awst 2009

Fersiwn 19

BIS

Busnes, Arloesi a Sgiliau

Mae'r canllaw hwn ar gael mewn ffurfiau eraill gan gynnwys Braille, print mawr a thâp clywedol. Am fanylion pellach gweler ein gwefan – www.companieshouse.co.uk neu e-bostiwch ein Hadran Ymholiadau ar enquiries@companieshouse.gov.uk neu ffoniwch ein Canolfan Gysylltu ar 0303 1234 500.

Rhaid bod yn ymwybodol o'r canlynol wrth ddarllen y nodiadau canllaw hyn:

Mae rhai (ond nid y cyfan) o ddarpariaethau Deddf Cwmnïau 2006 wedi dod i rym. Gan hynny, mae rhai o ddarpariaethau Deddf Cwmnïau 1985 yn dal yn berthnasol. Rydym wedi ceisio gwneud yn glir drwy'r holl nodiadau hyn, gymaint â phosibl, pa Ddeddf sy'n berthnasol. Os hoffech chi wybod rhagor, efallai yr hoffech ymweld â'n gwefan www.companieshouse.gov.uk lle gallwch weld pa ddarpariaethau yn y Deddfau priodol sydd mewn grym. Mae doler ar ein gwefan hefyd i wefan BIS (Yr Adran Busnes, Arloesi a Sgiliau) www.berr.gov.uk/bbf/co-act-2006/index.html, lle gallwch weld rhagor o wybodaeth. Mae rhai o'r darpariaethau yn y Ddeddf newydd yn amodol ar drefniadau trosiannol. Cyhyd â phosibl, eglurwn hyn yn y canllaw hwn a rhown fanylion ar ein gwefan

Mae un cam terfynol yng ngweithrediad Deddf Cwmnïau 2006 a drefnwyd ar gyfer Hydref 2009. Byddwn yn diweddarar unrhyw nodiadau canllaw a effeithir gan y gweithrediadau ar y pryd. Efallai yr hoffech gadw golwg ar ein gwefan hefyd lle byddwn yn cyhoeddi rhagor o wybodaeth wrth i'r broses o weithredu barhau, er mwyn ichi gael mynediad at y newyddion diweddaraf.

Tan fis Hydref 2009, mae'r nodiadau canllaw hyn yn gymwys i gwmnïau wedi eu ffurfio ym Mhrydain Fawr (Cymru, Lloegr a'r Alban) yn unig. Bwriedir wedyn i'r system ar wahân ar gyfer Gogledd Iwerddon ymdoddi i system gyfunol ar gyfer y Deyrnas Unedig i gyd.

Cynnwys

Cyflwyniad

1. Penodi archwilydd ariannol
2. Diswyddo archwilydd ariannol
3. Gwybodaeth bellach

Canllaw yn unig yw'r llyfryn hwn a dylid ei ddarllen ar y cyd â'r ddeddfwriaeth berthnasol:

- Deddf Cwmnïau 1985
- Deddf Cwmnïau 1989
- Deddf Cwmnïau 2006
- Gorchymyn Deddf Cwmnïau 2006 (Cychwyn Rhif 3, Diwygiadau Canlyniadol, Darpariaethau Trosiannol ac Arbedion) 2007
- Gorchymyn Deddf Cwmnïau 2006 (Cychwyn Rhif 5, Darpariaethau Trosiannol ac Arbedion) 2007
- Gorchymyn Deddf Cwmnïau 2006 (Cychwyn Rhif 6, Arbediad a Chychwyn Rhif 3 a Rhif 5 (Diwygio) 2008

Cyflwyniad

Mae'r llyfryn hwn yn egluro'n gryno swyddogaeth yr archwilydd cwmni. Mae'n amlinellu'r amgylchiadau lle nad oes eisiau i gwmnïau benodi archwilydd ariannol. Mae hefyd yn egluro'r drefn ar gyfer penodi a diswyddo archwilydd ariannol a'r unigolion a'r ffyrniau sy'n anghymwys i weithredu fel archwilydd ariannol.

Nid yw'r llyfryn yn ymdrin â swyddogaeth 'cyfrifydd hysbysu' a benodir i gwmnïau elusennol bach. Mae'r rôl honno'n cael ei dileu, a (heblaw yng Ngogledd Iwerddon) nid yw'r gyfraith ar gyfrifyddion hysbysu yn gymwys i gyfrifon am y blynyddoedd ariannol sy'n dechrau ar neu ar ôl 1 Ebrill 2008.

Pennod 1

Penodi archwilwyr ariannol

1. Beth yw archwilydd ariannol?

Mae archwilydd ariannol yn berson sy'n llunio ac yn cyflwyno i aelodau'r cwmni adroddiad annibynnol yn dweud a yw'r cwmni wedi paratoi ei ddatganiadau ariannol yn unol â'r Gyfraith Cwmnïau a'r fframwaith sy'n gymwys ar gyfer adroddiadau ariannol. Rhaid i'r adroddiad ddweud hefyd a yw cyfrifon y cwmni yn rhoi golwg wir a theg ar faterion y cwmni ar ddiwedd y flwyddyn.

2. Oes rhaid i gyfrifon pob cwmni gael eu harchwilio?

Nac oes. Os ydyn nhw'n gymwys i gael eu heithrio ac am fanteisio ar eithriad felly, does dim rhaid i gwmnïau segur na rhai cwmnïau bach drefnu i'w cyfrifon gael eu harchwilio. I fod yn gymwys i'w eithrio rhag archwilio ariannol cyflawn fel cwmni bach, rhaid i'r cwmni:

- fod yn gymwys fel un bach;
- bod â throsiant sydd heb fod yn fwy na £5.6 miliwn; a
- bod â chyfanswm mantolen sydd heb fod yn fwy na £2.8 miliwn.

Ar gyfer blynyddoedd ariannol yn dechrau ar neu ar ôl 6 Ebrill 2008, i fod yn gymwys i'w eithrio'n llwyr rhag archwilio ariannol, mae'n rhaid i gwmni:

- fod yn gymwys fel un bach;
- bod â throsiant sydd heb fod yn fwy na £6.5 miliwn; a
- bod â chyfanswm mantolen sydd heb fod yn fwy na £3.26 miliwn.

Gall cwmni cyfyngedig nad yw wedi masnachu yn ystod blwyddyn ariannol ac sy'n cwrdd â meini prawf penodol eraill wneud cais am eithriad rhag archwilio. Gweler ein llyfryn 'Cwmnïau Segur'. Does dim angen i gwmnïau segur benodi archwilwyr ariannol a chânt gyflwyno cyfrifon sylfaenol iawn i Dŷ'r Cwmnïau.

Ar gyfer blynyddoedd ariannol yn dechrau cyn 6 Ebrill 2008, er mwyn i gwmni elusennol fod yn gymwys i'w eithrio'n llwyr rhag archwilio ariannol, rhaid iddo fodloni'r amodau ar gyfer cwmni bach, rhaid i'w incwm gros beidio â bod yn fwy na £90,000 a rhaid i'w gyfanswm mantolen beidio â bod yn fwy na £2.8 miliwn (£1.4 miliwn ar gyfer blynyddoedd ariannol yn dod i ben ar neu cyn 30 Mawrth 2004).

Mae elusennau sydd ag incwm gros rhwng £90,000 a £250,000 a chyfanswm mantolen heb fod yn fwy nag £1.4 miliwn, yn gymwys i'w heithrio'n rhannol rhag archwilio.

SYLWER: Ar gyfer cyfnodau cyfrifeg yn dechrau ar neu ar ôl 6 Ebrill does dim categori penodol mwyach ar gyfer cwmnïau elusennol sydd wedi'u heithrio rhag archwilio. Fe fyddan nhw'n gymwys i'w heithrio rhag archwilio o dan y gyfraith cwmnïau yn yr un ffordd ag unrhyw gwmni arall. Gall cwmnïau elusennol wynebu gofynion ar wahân hefyd ynglŷn ag archwilio neu waith craffu arall ar eu cyfrifon o dan y gyfraith elusennau. I gael rhagor o wybodaeth, gweler:www.charity-commission.gov.uk/publications/cc32.asp

Mae rhagor o wybodaeth am eithrio cwmnïau bach a rhai segur rhag archwilio ariannol i'w chael yn ein llyfryn '[Cyfrifon a Dyddiadau Cyfeirnod Cyfrifeg](#)'.

3. Sut mae cwmni'n penodi archwilydd?

Mae'r rheolau yn wahanol yn achos cwmnïau cyhoeddus a chwmnïau preifat.

Ar gyfer cwmnïau cyhoeddus, y cyfarwyddwyr fydd yn penodi archwilydd ariannol cynta'r cwmni. Wedyn, bydd yr archwilydd yn dal mewn swydd tan ddiwedd cyfarfod cynta'r cwmni lle rhoir ei gyfrifon gerbron yr aelodau gan y cyfarwyddwyr. Yn y cyfarfod hwnnw, gall aelodau'r cwmni ailbenodi'r archwilydd, neu benodi un arall, i weithredu o ddiwedd y cyfarfod dan sylw hyd ddiwedd y cyfarfod nesaf lle rhoir cyfrifon gerbron gan y cyfarwyddwyr.

Ar gyfer cwmnïau preifat, mae'r cyfarwyddwyr yn penodi archwilydd cyntaf y cwmni. Wedyn caiff yr aelodau benodi neu ailbenodi archwilydd mewn cyfarfod o aelodau'r cwmni, neu drwy benderfyniad ysgrifenedig, o fewn 28 diwrnod ar ôl i'r cyfarwyddwyr anfon y cyfrifon at yr aelodau. Ond os na wnân nhw hyn, mae'r archwilydd a benodwyd yn parhau yn ei swydd nes i'r aelodau basio penderfyniad i'w ailbenodi neu i'w ddiswyddo fel archwilydd (caiff 5% o'r aelodau, neu lai os bydd yr erthyglau'n dweud hynny, orfodi penderfyniad i ddiswyddo archwilydd i gael ei ystyried). Er hynny, nid yw'r ddarpariaeth hon ynghylch parhau yn y swydd yn gymwys os cafodd penodiad diweddaraf yr archwilydd ei wneud gan y cyfarwyddwyr neu os yw erthyglau'r cwmni yn ei gwneud yn ofynnol i'r archwilydd gael ei benodi'n flynyddol.

4. Beth yw gwaith archwilydd ariannol?

Mae'r archwilydd yn cynnal yr archwiliad yn unol â'r Safonau Rhyngwladol ar Gyfrifydda (Y DU ac Iwerddon) a gyhoeddir gan y Bwrdd Arferion Archwilio. Mae archwiliad yn cynnwys edrych ar dystiolaeth sy'n berthnasol i'r symiau a'r datgeliadau yn y datganiadau ariannol. Mae hefyd yn cynnwys asesiad o'r amcangyfrifon a'r dyfarniadau arwyddocaol a wnaed gan y cyfarwyddwyr wrth baratoi'r datganiadau ariannol.

Rhaid i adroddiad yr archwilydd ariannol gynnwys:

- Cyflwyniad yn pennu'r cyfrifon a gafodd eu harchwilio;
- Disgrifiad o rychwant yr archwiliad ariannol, yn pennu'r safonau cyfrifeg a ddefnyddiwyd a'r fframwaith adrodd ariannol a ddefnyddiwyd wrth baratoi'r cyfrifon (h.y. ydyn nhw'n dilyn yr Egwyddorion Cyfrifydda a Dderbynnir yn Gyffredinol yn y DU (GAAP) neu'r Safonau Cyfrifydda Rhyngwladol (IAS) fel y maent wedi'u mabwysiadu gan yr UE?);
- Datganiad yn nodi p'un a gafodd y cyfrifon, ym marn yr archwilwyr, eu paratoi yn unol â Deddf Cwmnïau 1985 (ar gyfer blynyddoedd ariannol yn dechrau cyn 6 Ebrill 2006) neu 2006 (ar gyfer blynyddoedd ariannol dilynol) a, lle bo'n briodol, yn unol ag Erthygl 4 o Reoliad yr UE ar y Safonau Cyfrifydda Rhyngwladol, (Rheoliad (EC) 1606/2002, "Rheoliad IAS");
- Datganiad yn nodi a ydyn nhw'n rhoi golwg wir a theg ar faterion ariannol y cwmni neu (yn achos cyfrifon grŵp) y grŵp;
- Datganiad yn nodi a yw adroddiad y cyfarwyddwyr yn gyson â'r cyfrifon;
- Os yw'r archwilwyr o'r farn nad yw'r cwmni wedi cadw cofnodion cyfrifydda digonol, datganiad sy'n nodi hynny; ac
- Os nad yw'r cwmni wedi rhoi'r holl wybodaeth i'r archwilwyr y mae arnynt ei hangen er mwyn cwblhau'r adroddiad, datganiad sy'n nodi hynny.

Rhaid i adroddiad yr archwilwyr fod yn ddiamod neu'n amodol a rhaid iddo gynnwys cyfeiriad at unrhyw faterion y mae'r archwilwyr yn dymuno tynnu sylw ato i'w bwysleisio heb amodi'r adroddiad. Bydd yr archwilwyr yn amodi'r adroddiad naill ai lle cafwyd cyfyngiad ar rychwant gwaith yr archwilwyr neu lle cafwyd anghytundeb o sylwedd rhwng y cwmni a'r archwilwyr ynghylch y cyfrifon. Mae'n bosibl na fydd adroddiad amodol yn bodloni gofynion y banciau ar gyfer darparu arian i'r cwmni.

Ceir gofynion ychwanegol ar gyfer adroddiadau archwilwyr cwmnïau sydd wedi'u dyfynnu:

Adroddiad i aelodau'r cwmni ar y rhan archwiliadwy o'r adroddiad ar gydnabyddiaeth y cyfarwyddwyr ac a yw'r cwmni wedi'i baratoi yn unol â Deddf Cwmnïau 1985 neu 2006. (Deddf 1985 sy'n gymwys yn achos blynyddoedd ariannol yn dechrau cyn 6 Ebrill 2008, a Deddf 2006 ar gyfer blynyddoedd ariannol ar ôl hynny).

Rhaid i'r archwilwyr lofnodi a dyddio'r adroddiad y maent yn ei ddarparu ar gyfer y cwmni pan gaiff yr archwiliad ei gwblhau. Yn achos blynyddoedd ariannol yn dechrau cyn 6 Ebrill 2008 (h.y. o dan Ddeddf Cwmnïau 1985), rhaid i'r archwilwyr lofnodi'r copi sy'n cael ei gyflwyno i'r cofrestrdydd hefyd.

Yn achos blynyddoedd ariannol yn dechrau ar neu ar ôl 6 Ebrill 2008 a'r archwilydd yn ffym, rhaid i'r uwch-archwilydd statudol lofnodi adroddiad yr archwilwyr yn ei enw ei hun ar ran y ffym. Rhaid hefyd iddo ddyddio'r llofnod. Rhaid i'r cwmni ddatgan enw'r uwch-archwilydd statudol mewn copïau o'r adroddiad archwilio y mae'n eu cyhoeddi. Rhaid i gopïau o adroddiad yr archwilwyr a gyflwynir i'r cofrestrwydd ddatgan enwau'r ffym archwilio a'r uwch-archwilydd statudol, a chael eu llofnodi gan yr archwilydd neu (os ffym yw'r archwilydd) gan berson sydd wedi'i awdurdodi i lofnodi ar ran y ffym.

5. A oes unrhyw eithriadau rhag nodi enw'r archwilydd ar adroddiad yr archwilwyr?

Does dim eithriad rhag y gofyniad hwn o dan Ddeddf Cwmnïau 1985. Er hynny, ar gyfer cyfnodau cyfrifeg yn dechrau ar neu ar ôl 6 Ebrill 2008 mae hyn wedi newid. Os yw'r cwmni o'r farn bod perygl y gallai'r archwilydd neu unrhyw berson arall ddioddef trais neu fygwth difrifol pe bai enw'r archwilydd (neu enw'r "uwch-archwilydd statudol" a lofnododd yr adroddiad ar ran y ffym archwilio) yn ymddangos ar gopïau wedi'u ffeilio neu gopïau wedi'u cyhoeddi o'r adroddiad, caiff basio penderfyniad i hepgor yr enw o'r copïau hynny.

Paid ag anfon copi o'r penderfyniad i Dŷ'r Cwmnïau, ond dylech anfon hysbysiad ohono i'r cyfeiriad canlynol:

Yr Ysgrifennydd Gwladol
Bwlch post 4082
Caerdydd
CF14 3WE

Rhaid i'r hysbysiad nodi:

- enw a rhif cofrestru'r cwmni;
- blwyddyn ariannol y cwmni y mae'r adroddiad yn ymwneud â hi; ac
- enw'r archwilydd ac (os ffym yw'r archwilydd) enw'r sawl a lofnododd yr adroddiad fel uwch-archwilydd statudol.

Byddai angen i adroddiad yr archwilydd ynghlwm wrth y cyfrifon gynnwys y datganiad canlynol:

'Mae'r cwmni wedi pasio penderfyniad yn unol ag adran 506 o Ddeddf Cwmnïau 2006 na ddylai enw'r archwilydd gael ei nodi.'

6. A gaiff fy nghyfrifydd fod yn archwilydd ariannol imi?

Rhaid i archwilydd fod yn annibynnol ar y cwmni. Felly, ni all rhywun gael ei benodi'n archwilydd ariannol os yw:

- yn swyddog neu'n weithiwr i'r cwmni neu i gwmni cysylltiedig; neu

- yn bartner neu'n weithiwr i berson felly, neu'n bartneriaeth y mae person felly'n bartner o dani.

Os nad yw'ch cyfrifydd yn perthyn i'r un o'r categorïau uchod ac os oes ganddo dystysgrif gyfredol archwilio ariannol wedi ei rhoi gan gorff goruchwyllo cydnabyddedig, caiff weithredu'n archwilydd ariannol i'r cwmni.

COFIWCH: Nid yw pob aelod o gorff goruchwyllo cydnabyddedig yn gymwys i weithredu'n archwilydd. Bydd y corff goruchwyllo priodol yn gallu dweud wrthy'ch chi a oes gan unigolyn neu ffym arbennig dystysgrif gyfredol i gael dilyn gwaith archwilio ariannol.

7. Beth a phwy yw cyrff goruchwyllo cydnabyddedig?

Dyma gyrff a gydnabyddir gan y Bwrdd Goruchwyllo Proffesiynol ar gyfer Cyfrifeg fel rhai sydd â rheolau y bwriedir iddyn nhw sicrhau bod archwilydd ariannol o'r cymhwyster proffesiynol uchaf. Mae gan bob corff cydnabyddedig reoliadau caeth a chod disgyblu'n rheoli ymddygiad eu harchwilydd ariannol cofrestredig. Y pedwar corff cydnabyddedig yw:

1. The Institute of Chartered Accountants of Scotland
21 Haymarket Yards
Edinburgh EH2 5BH
Ffôn: 0131 347 0100
2. Sefydliad Cyfrifwyr Siartredig Cymru a Lloegr
Level 1
Metropolitan Court
321 Avebury Boulevard
Milton Keynes
MK9 2FZ
Ffôn: 01908 248100
3. The Institute of Chartered Accountants in Ireland
Chartered Accountants House
87-89 Pembroke Road
Dublin 4
Ffôn: 0035 3166 80400
4. The Association of Chartered Certified Accountants
2 Central Quay
89 Hydepark Street
Glasgow
G3 8BW
Ffôn: 0141 582 2000

Ceir hefyd Gymdeithas y Cyfrifwyr Cyhoeddus Awdurdodedig, 10 Lincoln's Inn Fields, Llundain WC2A 3BP, Ffôn: 020 7396 5954; ond is-gwmni yw'r gymdeithas hon i Gymdeithas y Cyfrifwyr Ardystiedig Siartredig

COFIWCH: Gallwch chi ofyn i'ch archwilydd ariannol gadarnhau ei fod wedi cofrestru gydag un o'r cyrff hyn, neu fe allwch gysylltu â'r corff priodol.

8. Ai â chyfrifon blynyddol yn unig y bydd archwilydd ariannol yn ymwneud fel arfer?

Yn ddarostyngedig i safonau moesegol yr APB, mae dyletswyddau statudol yr archwilwyr wedi'u cyfyngu i wirio bod yna ddogfennau a chofnodion digonol, ac i gyflwyno adroddiad ar y cyfrifon blynyddol. Fodd bynnag, does dim sy'n eich rhwystro rhag cyflogi archwilydd ariannol at ddibenion eraill, fel trefnu'r llyfrau neu'r ffurflen dreth, ar yr amod nad yw'n cyfrannu at reolaeth y cwmni.

Mae'n rhaid i gwmnïau y mae eu cyfrannau'n cael eu masnachu ar farchnadoedd stoc rheoledig gynhyrchu cyfrifon yn amlach nag unwaith y flwyddyn. Dyma'r "adroddiadau ariannol hanner blwyddyn" er eu bod weithiau'n cael eu disgrifio fel "cyfrifon interim".

Dylech chi gytuno ar lythyr cyflogi sy'n nodi hyd a lled tasg yr archwilydd a ffurf unrhyw adroddiadau y bydd yr archwilydd yn eu cyflwyno .

Pennod 2

Diswyddo archwilwyr ariannol

1. A all cwmni ddiswyddo archwilydd ariannol?

Gall. Caiff aelodau'r cwmni symud archwilydd ariannol o'i swydd unrhyw adeg yn ystod tymor ei wasanaeth, neu benderfynu peidio ag ailbenodi'r archwilydd am gyfnod pellach. Rhaid iddyn nhw roi i'r cwmni rybudd 28 diwrnod o'u bwriad i gyflwyno gerbron cyfarfod cyffredinol gynnog i ddiswyddo'r archwilydd neu i benodi rhywun arall. Yn achos penderfyniad ysgrifenedig cwmni preifat i benodi rhywun arall, mae gan y cwmni 28 diwrnod yn lle'r 21 diwrnod arferol i gylchredeg y penderfyniad. Mae'n rhaid hefyd i'r cwmni anfon copi o'r hysbysiad o'r penderfyniad arfaethedig at yr archwilydd, y mae ganddo hawl wedyn i gyflwyno ymateb ysgrifenedig ac i'w gwneud yn ofynnol i'r cwmni ei anfon at aelodau'r cwmni, ac i siarad yn y cyfarfod lle mae'r penderfyniad i gael ei ystyried.

Er y gall y cwmni symud archwilydd ariannol o'i swydd unrhyw adeg, gall fod gan yr archwilydd hawl i ddigollediad neu iawndal yn sgîl terfynu ei benodiad.

Os bydd archwilydd ariannol yn peidio â dal swydd am unrhyw reswm, rhaid iddo adneuo datganiad yn swyddfa gofrestredig y cwmni. Os nad yw'r cwmni wedi'i ddyfynnu ar gyfnewidfa stoc, dylai'r datganiad nodi unrhyw amgylchiadau sy'n gysylltiedig â'r ffaith ei fod yn peidio â dal swydd y mae'n credu y dylid dod â nhw i sylw aelodau a chredydwyr y cwmni. Os yw'r cwmni

wedi'i ddyfynnu, mae'n rhaid iddo nodi'r amgylchiadau p'un a yw'n credu bod angen dod â nhw i sylw aelodau a chredydwyr y cwmni neu beidio.

- Os bydd yr amgylchiadau'n cael eu nodi yn y datganiad, rhaid i'r cwmni anfon copi o'r datganiad at ei holl aelodau oni wneir cais llwyddiannus i'r llys am atal hyn. Os na chaiff yr archwilydd ariannol hysbysiad am gais drwy'r llys cyn pen 21 diwrnod wedi iddo adneuo'r datganiad gyda'r cwmni, rhaid i'r archwilydd, cyn pen 7 diwrnod pellach, anfon copi o'r datganiad i Dŷ'r Cwmnïau ar gyfer cofnod cyhoeddus y cwmni;
- Os nad yw'r amgylchiadau (yn achos cwmni sydd heb ei ddyfynnu) wedi'u nodi yn y datganiad, rhaid i'r archwilydd ariannol adneuo datganiad gyda'r cwmni i'r perwyl hwnnw. Does dim rhaid i'r cwmni gylchredeg y datganiad hwn i'r aelodau.

Os bydd yr archwilydd yn ymddiswyddo neu'n cael ei ddiswyddo yn ystod ei gyfnod yn ei swydd, rhaid i'r cwmni roi gwybod i'r "awdurdod archwilio priodol", sef y Bwrdd Goruchwylio Proffesiynol os yw'r archwiliad yn "archwiliad mawr", neu gorff proffesiynol y ffyrm archwilio mewn achosion eraill. "Archwiliad mawr" yw archwiliad ar gwmni ar Restr Swyddogol y Gyfnewidfa Stoc sy'n cael ei chadw gan yr Awdurdod Gwasanaethau Ariannol, neu gwmni arall y mae gan y cyhoedd fuddiant mawr yn ei gyflwr ariannol. Gyda'r hysbysiad, rhaid i'r cwmni anfon naill ai'r datganiad y mae'r archwilydd wedi'i adneuo gyda'r cwmni neu ddatganiad y cwmni ei hun.

Mae canllawiau manylach am y darpariaethau hyn ar gael ar wefan y Cyngor Adroddiadau Ariannol yn www.frc.org.uk/pob/regulation/notification.cfm

Pennod 3

Gwybodaeth bellach

1. Sut mae anfon gwybodaeth at y Cofrestrydd?

Y ffordd fwyaf diogel a sicr i anfon gwybodaeth statudol i Dŷ'r Cwmnïau yw defnyddio'n gwasanaethau ffeilio ar-lein. Mae WebFiling yn cynnig templedi dogfennau i'w lawrlwytho am ddim. Mae'r rhain yn cynnwys gwiriadau pwrpasol er mwyn ichi sicrhau nad ydych wedi hepgor gwybodaeth allweddol. I gael rhagor o wybodaeth am argaeledd a manylion cofrestru, edrychwch ar ein gwefan www.companieshouse.gov.uk.

Gallwch chi gyflwyno dogfennau i'r Cofrestrydd â llaw (yn bersonol neu drwy negesydd), gan gynnwys y tu allan i oriau swyddfa, dros wyliau banc a thros y penwythnos i Gaerdydd, Llundain a Chaeredin.

Gallwch chi hefyd anfon dogfennau drwy'r post, drwy'r Gwasanaeth Cyfnewid Dogfennau (DX) neu drwy'r Post Cyfreithiol (LP) yn yr Alban. Os anfonwch chi ddogfennau drwy'r post, byddwch cystal â'u cyfeirio at:

Ar gyfer cwmnïau wedi eu corffori **Ar gyfer cwmnïau wedi eu corffori**

Yng Nghymru a Lloegr:

Tŷ'r Cwmnïau
Ffordd y Goron
Caerdydd
CF14 3UZ

DX33050 Caerdydd 1

Yn yr Alban:

Companies House
4th Floor
Edinburgh Quay 2
139 Fountainbridge
Edinburgh
EH3 9FF

DX ED235 Edinburgh 1
neu
LP – 4 Edinburgh 2

Dim ond os darparwch chi amlen stampiedig yn dangos eich cyfeiriad dychwelyd y byddwn yn cydnabod bod dogfennau wedi dod i law yn Nhŷ'r Cwmnïau.

Sylwer: nid yw cydnabyddiaeth dod i law yn golygu bod dogfen wedi ei derbyn i'w chofrestru yn Nhŷ'r Cwmnïau.

Mae Tŷ'r Cwmnïau yn anfon cydnabyddiaeth awtomatig drwy'r e-bost ar gyfer pob cyflwyniad sy'n cael ei wneud drwy WebFiling a neges e-bost ychwanegol i ddweud a yw'r cyflwyniad wedi'i dderbyn ynteu wedi'i wrthod.

Sylwer: Nid yw Tŷ'r Cwmnïau yn derbyn cyfrifon na dogfennau statudol eraill dros beiriant ffacs.

2. Ble galla i gael ffurflenni a llyfrynnau canllaw?

Cewch gyflwyno llawer o ffurflenni i Dŷ'r Cwmnïau ar-lein drwy'n gwasanaethau Software Filing neu WebFiling. Mae'r gwasanaeth yn system ddiogel ar gyfer cyflwyno gwybodaeth am gwmnïau.
(www.companieshouse.gov.uk)

Fel arall, mae ffurflenni statudol a l canllaw ar gael, yn rhad ac am ddim, gan Dŷ'r Cwmnïau. Y ffordd gyflymaf i'w sicrhau yw drwy'n gwefan neu drwy ffonio 0303 1234 500.

Gellir hefyd gael ffurflenni gan ddogfenwyr cyfraith cwmnïau, cyfrifwyr, cyfreithwyr ac asiantiaid ffurfio cwmnïau – cyfeiriadau mewn llyfrau ffôn ar gyfer busnesau.

sut i gysylltu â ni

Canolfan Cysylltu: 0303 1234 500*
Mini-com: 029 2038 1245
enquiries@companieshouse.gov.uk
www.companieshouse.gov.uk

*At ddibenion hyfforddi a sicrhau ansawdd,
fe allai eich galwad gael ei monitro

Caerdydd

Tŷ'r Cwmnïau
Ffordd y Goron, Caerdydd CF14 3UZ
Ffacs: 029 2038 0900

Caeredin

Companies House
4th Floor
Edinburgh Quay 2
139 Fountainbridge
Edinburgh EH3 9FF

Ffacs: 0131 535 5820

Llundain

Companies House
21 Bloomsbury Street, London WC1B 3XD
Ffacs: 029 2038 0900